

Aalisarsinnaanermut akuersissuteqartarneq pillugu Namminersorlutik Oqartussat nalunaarutaat

Aalisarneq pillugu Inatsisartut inatsisaat nr. 18, 31. oktober 1996-imeersumi, §§ 9, 10, 10 a aamma 11, § 13, imm. 2 aamma imm. 3, § 14, imm. 2, § 21, imm. 2, §§ 22 aamma 23, § 33, imm. 2 kiisalu § 34, imm. 3, kingullermik Aalisarneq pillugu Inatsisartut inatsisaata allanngortinneqarnera pillugu Inatsisartut inatsisaat nr. 17, 3. december 2009-meersukkut allanngortinneqarnera naapertorlugu aalajangersarneqarpoq:

Atuuffii

§ 1. Nalunaarut aalisarneq pillugu inatsimmi § 6 aamma § 9 naapertorlugit angallammik Kalaallit Nunaanni nalunaarsorsimasumik, aamma aalisarneq pillugu inatsimmi § 7 naapertorlugu nunani allamiut angallataannik imartani Kalaallit Nunaata aalisarnikkut oqartussaaffigisaani atuuppoq.

Imm. 2. Nalunaarut manna malillugu akuersissummut tunniunneqartumut piginnittoq sinerissap titarnerullu aalisarnikkut oqartussaaffiup tunngaviusumik killingata 3 sømilinik avataaniittup akornanni imartami aalisartoqarsinnaavoq ukuninnga:

- 1) angallatinut usitussutsumut uuttuutaat malillugu 75 BRT/120 BT-itut mikinerusunut,
- 2) angallatit OZJO, OUHK aamma OUUC-mik radiukkut attaveqartilluni ilisarnaatillit imaluunniit
- 3) angallatinut uiluinniarnissamut akuersissuteqarfigineqarsimasunut.

Imm. 3. Nalunaarut manna malillugu akuersissummut tunniunneqartumut, imartami sinerissap titarnerullu aalisarnikkut oqartussaaffimmut tunngaviusumik killeqarfiit avataanni 3 sømilit akornanni angallatinut usitussutsumut uuttuutaat malillugu 75 BRT/120 BT-itut angissusilinnut anginerusunulluunniit aalisarnissaq inerteqqutaavoq. Taamaattoq takuuk imm. 2, nr. 2 aamma 3.

Imm. 4. Angallatinut OZTZ, OULB, OVXD, OWES, OYKA, OVOJ, OWMZ aamma OZTJ-imik radiukkut attaveqartilluni ilisarnaatilinnut imartap aalisarnikkut oqartussaaffiusup tunngaviusumik killeqarfia sinerissap qanittuani akuersissutitut tunngatillugu kangimut killeqarfiuvoq.

§ 2. Nalunaarummi matumani angallatip usitussutsumigut killigititaasunik qaangiisimaneranut ataassisimaneranulluunniit aalajangiisuussaaq usitussutsikkut annertussuseq angallatip angissusiligaaneranut uppernarsaammi allassimasoq, angallatip angissusiligaaneranut uppernarsaasiinermi uuttuinnermut maleruagassat sorliit atorineqarneri apeqquaatinnagit.

Piffissaa killilerlugu akuersissut

§ 3. Piffissaa killilerlugu akuersissutit ukiumik ataatsimik sivisunerpaaffissalerneqartassapput.

§ 4. Piffissaa killilerlugu akuersissutit, pisat amerlanerpaaffissaannik akuerisaasumik aalajangersagartallit, aalisarnernut makkununga tunniunneqartassapput inuussutissarsiutigalugulu aalisarsinnaanermut

piumasaqaataallutik:

- 1) pisassat suugualarpataluunniit angallatit 75 BRT/120 BT-itut angissusillit anginerusunilluunniit atorlugit,
- 2) angallatip angissusia apeqquataatinnagu uiluinniarnermut, imaluunniit
- 3) imartani nunat allat nunalluunniit tamalaat suleqatigiiffisa aalisarnermik aqutsinissamut oqartussaaffigisaanni angallatit Kalaallit Nunaanni nalunaarsorneqarsimasut atorlugit aalisarnermut.

§ 5. Piffissaa killilerlugu akuersissutit, pisat amerlanerpaaffissaannik akuerisaasumik aalajangersagartallit, aalisarnermut makkununga tunniunneqartassapput inuussutissarsiuutigalugulu aalisarsinnaanermut piumasaqaataallutik:

- 1) immikkut pisuni, uumassusilinnik ilisimatuut siunnersuinerat angallatinut ataasiakkaanut pisat annertunerpaaffissaannik akuerisaasumik aalajangersaanissamut pissutissaqartitsinngikkaangat, kalaallit angallataat atorlugit aalisarnermi,
- 2) qalerallinniarnermut, saattuarniarnermut saarullinniarnermullu, kalaallit angallataat atorlugit aalisarnermi pisassat aalisarneqarsinnaasut angallatinut Kalaallit Nunaanni nalunaarsorneqarsimasunut ataatsimoorussaappata,
- 3) imartani Kalaallit Nunaata aalisarnikkut oqartussaaffigisaani nunani allamiut angallataannik aalisarnermut, pisassat aalisarneqarsinnaatitaasut nunap angerlarsimaffigisap pineqartup angallataanut ataatsimoorussassaattillugit, imaluunniit
- 4) imartani Kalaallit Nunaata aalisarnikkut oqartussaaffigisaani misileraalluni aalisarnermut, angallatip nunamit suminngaanneernera apeqquataatinnagu.

Piffissaa killilernagu akuersissut

§ 6. Piffissaa killilernagu akuersissutit, pisat amerlanerpaaffissaannik akuerisaasumik aalajangersagartallit, aalisarnermut makkununga tunniunneqartassapput inuussutissarsiuutigalugulu raajarniarsinnaanermut piumasaqaataallutik.

Imm. 2. Akuersissutip taamaattup pisassiissutinit pigisat akuersissummut tunngavigisaasut nalunaarpai, pisassiissutinit pigisat tassaallutik imartami pisassa qarfiusumi aalisariutit ilaannut immikkoortunut Naalakkersuisut pisassatut aalajangigaasa procentiisa ilaat.

Imm. 3. Nalunaarummi matumani "aalisariutit ilaat immikkoortut", angallatit erseqqissumik killilerneqarlutik immikkoortutut, § 1 naapertorlugu, Kalaallit Nunaanni angerlarsimaffeqartutut paasineqassapput.

Imm. 4. Akuersissummut taamaattumut atatillugu ukiut tamaasa ukiup pisassa qarfiusup aallartinnginnerani ukiumut pisassat nalunaarutigineqartassapput. Ukiumut pisassanik nalunaarutikkut ukiumi tassani pisassiissutit pigisat tonsinngorlugit annertussusii nalunaarneqartarput.

Imm. 5. Kalaallit Nunaata Kitaani pisassanit sinerissap qanittuani aalisariutit ilaannut immikkoortunut pisassiissutigineqartunit kilisaatit raajarniutit, angallatip uuttuutaanut uppersaasat malillugu 75 BRT/120 BT-init mikinerusut akuersissuteqarfigineqartussaapput.

Imm. 6. Kilisaatit raajarniutit 75 BRT/BT 120-nik angissusillit anginerusullu Kalaallit Nunaata Kitaani raajartassanit aalisariutit ilaannut immikkoortunut avataasiutinut immikkoortinneqartunik Tunumilu raajarniarnissamut akuersissuteqarfigineqassapput.

§ 7. Umiarsuaatileqatigiiffik ukiumut pisassaminik nunguutsisimasooq tamatumunga qinnuteqarsimaguni, 15. novemberip kingornatigut aalisarnerminik ingerlatseqqinissaminnut akuerineqarsinnaavoq

pisarineqartut ukiumi pisassiivimmi tullermi umiarsuaatileqatigiiffimmut pisassiissutigineqartunit ilanngaatineqartussanngorlugit.

Imm. 2. Umiarsuaatileqatigiiffik ukiumut pisassami ilaannik nunguutsinngitsoorsimasoq, tamatumunnga qinnuteqarsimaguni ukiumut pisassaminik ukiumi tuliuttumi ukiumut pisassaminik amerlisitsisinnaavoq, ukiup siulianit pisarinngitsuukkami amerlaqataanik. Taamaattorli pisassat nuunneqartut kingusinnerpaamik apriilip 30-ianni aalisarneqareersimassapput.

Imm. 3. Imm. 1 aamma 2 malillugit qinnuteqaatit Aalisarnermut, Piniarnermut Nunalerinermullu Aqutsisoqarfimmut nassiunneqassapput, Aqutsisoqarfimmilu tiguneqarsimassallutik kingusinnerpaamik imm. 1 naapertorlugu aalisarnerup ingerlaqqinnissaa sapaatit akunnerinik marlunnik sioqqullugu, imaluunniit imm. 2 naapertorlugu pisassanik nuussinissaq kissaatigineqarsimappat.

Imm. 4. Qinnuteqaammi aalisarneqartussatut kissaatigineqartut amerlassusii imaluunniit ukiumi tuliuttumi nuunneqartussat amerlassusii taaneqassapput.

Aalajangersakkat tamanut atuuttut

§ 8. Piffissaa killilerlugu akuersissut, § 3 naapertorlugu taassumaluunniit assilineqarnera aalisartilluni angallammiitinneqartassapput. § 6, imm. 1 naapertorlugu piffissaa killilernagu akuersissut pineqarpat ukiumut pisassanik nalunaarut taassumaluunniit assilineqarnera aalisartilluni angallammiitinneqartassapput.

§ 9. Akuersissut piginnittumut aalajangersimasumut ataatsimut tunniunneqassaaq, tassanilu allassimassallutik angallatit aalisarnermut atorineqarsinnaasut. Taamaattorli, § 6, imm. 1 naapertorlugu, akuersissummut piffissaa killiligaanngitsumut atatillugu, ukiumut pisassanik nalunaarummi tassunga atasumi angallatit taaneqassapput.

Imm. 2. Akuersissutip tunniunneqarnerani tunngaviusut allannguuteqarneri, taamatuttaaq piginnittut allannguuteqartillugit, aalisarneq pillugu inatsimmi § 6 naapertorlugu, Naalakkersuisunut akuersissutigisassanngorlugit saqqummiunneqassapput.

§ 10. Taamaallaat angallatit Aalisarnermut, Piniarnermut Nunalerinermullu Aqutsisoqarfimmit akuerineqarsimasut atorineqarsinnaapput.

Imm. 2. Aalisarnermut, Piniarnermut Nunalerinermullu Aqutsisoqarfiup taamaallaat akuerisinnaavai angallatit:

- 1) aalisarneq pillugu inatsimmi aalajangersakkanut naapertuuttumik pigineqartut, aamma
- 2) Naalakkersuisut naliliinerat malillugu aalisarnissamut periarfissanut atuuttunut naleqquttumik aalisarsinnaassusillit.

Imm. 3. Akuerineqarnissamik qinnuteqaat Naalakkersuisunut allaganngorlugu tunniunneqassaaq.

Imm. 4. Sumi nunaqarnermut uppernarsaatip aamma angallatip angissusiligaaneranut uppernarsaatip nuutinneqarnera angallatip akuerineqarnissaa pillugu qinnuteqaammut ilanngunneqassapput. Angallatip angissusiligaaneranut uppernarsaat allannguuteqarpat motoorialuunniit pingaarneq taarserneqarpat allatigulluunniit malunnaatilimmik allannguisoqarsimappat angallatip angissusiligaaneranut uppernarsaatip nutaap nuutinneqarneranik nassiussisoqassaaq.

§ 11. Imartani Kalaallit Nunaata aalisarnikkut oqartussaaffigisaasa avataanni kinaluunniit § 4, imm. 1, nr. 3 naapertorlugu inuussutissarsiutigalugu aalisarnissamut akuersissuteqarfigineqarsimasoq, nunat tamalaat isumaqatigiissutaannik aalisarfusumi Kalaallit Nunaannut atuuttunik, malinnittussaataitaavoq.

Imm. 2. Kinaluunniit, imm. 1 naapertorlugu, imartami isumaqatigiissuteqarfusimasumi

inuussutissarsiutigalugu aalisarteq nakkutilliinermut allatulluunniit iliuutsinut nunat tamalaat isumaqatigiissutaat naapertorlugit ingerlanneqartunut akerlilersuisinnaangilaq.

Pineqaatissiinerit

§ 12. § 1, imm. 2 - 4, §§ 4 aamma 5, § 6, imm. 1- 3, §§ 7 aamma 8, § 9, imm. 1, § 10, imm. 1 aamma 2-p unioqqutinneqarnerat kiisalu akuersissummi atugassarititaasut sumiginnarneqarnerat akiliisitsinermik pineqaatissiissutaasinnaapput.

Imm. 2. § 11-mut akerliusumik inuussutissarsiutigalugu aalisarneq akiliisitsinermik kinguneqarsinnaavoq, nunat tamalaat isumaqatigiissutaat imaluunniit isumaqatigiissut pineqaatissiisarnermut aalajangersakkamik imaqaraluarpataluunniit.

Imm. 3. Akileeqqusissutit una nalunaarut malillugu akiligassanngortinneqartut Landskarsimut nakkartinneqassapput.

Imm. 4. Ingerlatseqatigiiffiit ilaallu ilanngullugit (inatsisitigut piginnaatitaasut pisussaatisullu) pinerluttulerinermi inatsisit tunngavigalugu naalakkerneqarsinnaapput kapitali 5 naapertorlugu.

Imm. 5. Pinerluttulerineq pillugu inatsimmi pinngitsaaliinikkut arsaarinnittarnermik maleruagassat atuupputtaaq.

Imm. 6. Kalaallit Nunaata eqqaani aalisarnermi malittarisassanik akuersissummiluunniit piumasaqaatinik unioqqutitsineq taassuma atorneqarsinnaatitaaneranut killiliissutinik kiisalu pissutsit ilungersunarnerutillugit imaluunniit unioqqutitsisoqaqqitsillugu piginnaatitaaffimmik arsaarinninnermik kinguneqarsinnaapput. Tamakku pillugit Naalakkersuisut aalajangiissapput, nalunaarutigineqarneranillu ullut 15-it qaangiutsinnagit Nunatta Eqqartuussivianut, suliassanngortinneqarsinnaalluni aalisarneq pillugu inatsimmi § 21, imm. 4 malillugu.

Imm. 7. Pineqaatissiissutit pillugit suliat allatigut aalisarneq pillugu inatsimmi aalajangersakkat malillugit suliarineqassapput.

Atuutilerfia

§ 13. Nalunaarut 15. maj 2010 atuutilerpoq.

Imm. 2. Peqatigitillugu aalisarsinnaanermut akuersissuteqartarneq pillugu Namminersornerullutik Oqartussat nalunaarutaat nr. 5, 31. januar 2002-meersoq atuukkunnaarsinneqarpoq.

Namminersorluni Oqartussat, ulloq 6. maj 2010

Ane Hansen

/

Jens K. Lyberth

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut